

Р-12  
321




# АКАВИСТЪ

ПРЕПОДОБНОМУ ОЦУ НАШЕМУ

ГРИГОРІЮ,

ИЖЕ НА ПЕЛЬШМЪ РЪЦѢ

ВОЛОГОДСКОМУ ЧУДОТВОРЦУ.



С.-ПЕТЕРБУРГЪ.

ТИПОГРАФІА А. ТРАНШЕЛЯ, СТРЕМИННАЯ, № 12.

1884.





Литогр. А. Граншеля.

Р 112  
321

# АКАДЕМІЯ

ПРЕПОДОВНОМУ ОТЦУ НАШЕМУ

ГРИГОРІЮ,

ИЖЕ НА ПЕЛЬШИМЪ РѢЦѢ

ВОЛОГОДСКОМУ ЧУДОТВОРЦУ.



С.-ПЕТЕРБУРГЪ.

- Типографія и Хромофотографія А. Траншеля Стремянная № 12.

1884.



Отъ Сиб. Комитета Духовной Цензуры печатать дозволяется. Сиб. 16 марта 1884.  
Цензоръ Архимандритъ *Арсеній*.

РОССИЙСКАЯ  
ГОСУДАРСТВЕННАЯ  
БИБЛИОТЕКА

17695-95



2007339242

ЦЕНТРАЛЬНЫЙ  
КНИГООБМЕННЫЙ  
ФОНД

# АКАФИСТЪ

Преподобному Отцу нашему Григорію,

иже на Пельшмѣ рѣцѣ, Вологодскому Чудотворцу.

## Кондакъ 1.

**В**озбранный угодниче Христовъ, святе Григоріе, яко благій рабъ вшедый въ радость Господа твоего, моли Владыку небесъ и земли подати намъ благодать свыше, съ терпѣніемъ до конца понести благое и легкое иго его, да зовемъ ти, якоже чада ко отцу: радуйся, угодниче Христовъ, Григоріе богомудре.

## Икосъ 1.

Ангеловъ лики твоему великому въ спасительныхъ подвижѣхъ терпѣнію удивившася: и мы, ублажая благодатное званіе твое на служеніе Господу, радостно возглашаемъ тебѣ: Радуйся, отъ пеленъ избранный Богу; радуйся, добротами духа издѣтка украшенный. Радуйся, чистотою душевною возсіявый; радуйся, знаменія благодати явѣ въ себѣ носивый.



Радуйся, древо насажденное посреда церкви Божіа; радуйся, цвѣте божественнаго сада. Радуйся, благовоздѣланная лозо винограда Христова; радуйся, отъ юнаго возраста тѣснымъ путемъ шествовати избравый. Радуйся, отъ младости себе Христу возложивый; радуйся, угодниче Христовъ, Григоріе богомудре.

### Кондакъ 2.

Видя благая міра сего скоротечна и непостоянна, умъ твой ко Творцу возложивъ, пренебрегъ еси рода свѣтлость, лествъ богатства временнаго, и отъ юности возлюбилъ еси возлюбившаго тя, еже взывати къ нему: Аллилуіа.

### Икосъ 2.

Разумъ лжеименень ко спасенію вѣдя, озаритися свыше восхотѣлъ еси; сего ради съ разумомъ и волю въ послушаніе плѣняя вѣрѣ, въ терпѣніи восхотѣлъ еси стяжати душу твою: тѣмъ и мы отъ отрочества ты избранный сосудъ благодати вѣдя, воіемъ къ тебѣ: Радуйся, Духа Святаго благопріятное обиталище; радуйся, благодатный плодъ въ души твоей воздѣлавый. Радуйся, насажденіе во дворѣхъ дому Бога нашего красно процвѣтшее; радуйся, ангельское житіе возлюбивый. Радуйся, отъ младыхъ ногтей стезямъ подвигоположника послѣдовавый и душу твою Богу сочетаавый; радуйся, сладости плотскаго сожитія богомудро презрѣвый. Радуйся, яко изволеніемъ Божіимъ и родители твои соизволиша, да работаеши Христу; радуйся, яко возлюбивъ нищету некрадому, богатство родителей твоихъ оставилъ еси. Радуйся, яко рабы твоя и рабни свободивъ,



всего себе Христу поработилъ еси; радуйся, угодниче Христовъ, Григоріе богомудре.

### **Кондакъ 3.**

Силою невидимою веденъ былъ еси въ незнаемыя и непроходимыя мѣста, егда убогая славы челоувѣческія, честь и достояніе земное оставилъ еси, пришелъ же еси во обиталище невѣдомо, хотя въ скорбехъ научиться пѣти: Аллилуіа.

### **Икосъ 3.**

Имѣя твердое предложеніе до конца оставить міръ, по преставленіи честныхъ родителей твоихъ, вся имѣнія твоя нищимъ и убогимъ раздалъ еси, да стяжеша себѣ сокровище на небеси, егоже обрѣсти сподоби и насъ пѣснославящихъ тя: Радуйся, славная міра сего во уметы вмѣнивый; радуйся, яко душею твоею предложивый обрати богатство нетлѣнное. Радуйся, въ веселіи сердца крестъ Христовъ на рамо твое вземый; радуйся, христоролюбивыми трудами крѣпость духа стяжавый. Радуйся, слезами, яко росою, душевную ниву напоивый; радуйся, тщавыйся не себѣ, но Христу жити безстрастіемъ. Радуйся, совѣстію чистою въ молитвахъ, аки безплотенъ бывый; радуйся, на богокрасную доброту взирая, отъ плотскія доброты око твое отвративый. Радуйся, постомъ, бдѣніемъ, воздержаніемъ, лествицею міра и плоти низложивый; радуйся, угодниче Христовъ, Григоріе богомудре.

### **Кондакъ 4.**

Бурю страстей во плоти челоувѣчесте волну-



щуюся, отъ юна возраста укротити тщился еси, егда въ сердце твое начало премудрости страхъ Божій всадивъ, и бывъ исполненъ имъ, николиже дѣтскимъ глумленіемъ примѣшался еси, но во дни и въ нощи закону Божию поучался, пѣсенно глаголае еси: Аллилуіа.

#### Икосъ 4.

Слыша труды и подвиги богоноснаго Діонисіа, ученикъ былъ еси его, преуспѣвъ же въ добродѣтеляхъ его, обитель нову наздати восхотѣлъ еси. И мы, вкушая нынѣ плоды трудовъ твоихъ, въ веселіи воспѣваемъ: Радуйся, въ подвижѣхъ великому Діонисію соревновавый; радуйся, въ силѣ Христовой евангельскимъ путемъ шествовавый. Радуйся, бдѣніемъ и молитвою душу твою очистивый; радуйся, лѣствицею добродѣтелей на мысленное небо возтекій. Радуйся, смиреніемъ высокая, нищетою богатая стяжавый; радуйся, обитель, яко садъ небесный насадивый. Радуйся, въ подвижѣхъ образъ инокомъ бывый; радуйся, пустынный жителю, въ тѣлеси Ангеломъ подобивыйся. Радуйся, безмолвія любителю, духомъ твоимъ въ вышнихъ обитаый; радуйся, угодниче Христовъ, Григоріе богомудре.

#### Кондакъ 5.

Боготечное къ царствію небесному совершая шествіе, потщался еси въ любви Христовой и иныхъ на стези правыя къ нескончаемъй жизни направляти, да умудренные тобою во спасеніе зовемъ: Аллилуіа.



### Икосъ 5.

Видѣвши владыцы и князи людстїи благоразсудливостъ и добродѣтели твоя, Преподобне, искаху просвѣтитися и пользоваться отъ тебе, якоже сотвори князь отечественныя страны Юрій, егоже чадѣ крещеніемъ просвѣтилъ еси, тѣмже восхваляемъ тя: Радуйся, истиннаго разума учителю; радуйся пути, вводящаго въ жизнь, наставниче. Радуйся, прилѣжно обучаваемый и обучающий благочестію; радуйся, вѣрно утверждаемый и утверждавый въ православіи. Радуйся, поклоняемый Богу духомъ и истиною; радуйся, служившій ему во исповѣданіи устъ и сердца. Радуйся, вѣры истинныя блюстителю; радуйся, уставовъ и законоположеній церкви хранителю. Радуйся, иноковъ богосвѣтлый вождю; радуйся, угодниче Христовъ, Григоріе богомудре.

### Кондакъ 6.

Проповѣдуютъ вѣрнии миротвореніе твое, Преподобне, егда услышавъ нестроеніе двухъ князей, единого низверженна съ престола, другаго же нагло похитивша чуждое наслѣдіе, потщался еси шествовати въ царственный градъ Москву и примиренію княжеску послужити, да при воспріятіи каждымъ своего воспѣваеши съ ними: Аллилуіа.

### Икосъ 6.

Возсія ревность твоя по достояніи Христовомъ, благосерде, егда строптивый князь Димитрій прииде злобно на градъ Вологду съ ратію, и многа зла



людемъ сотвори; ты же небоязненно обличивъ неистовство его, яко миротворецъ, безчестіе и поруганіе претерпѣлъ еси: сего ради видя миролюбный подвигъ твой, достойно восхваляемъ тя: Радуйся, мира и правоты въ людехъ блюстителю; радуйся, мщенія и злобы отъ сердець искоренителю. Радуйся, твердый защитниче невинности и неправедныхъ умышлений обличителю; радуйся, градовъ и гражданъ умирителю. Радуйся, готовый въ напасть защитниче; радуйся, властолюбія протонителю. Радуйся, отъ смуть и треволненій житейскихъ исхитителю; радуйся, ходатаю о людехъ предъ Богомъ и предъ князи людей. Радуйся, яко тобою познаемъ, коль красно быти въ мирѣ; радуйся, угодниче Христовъ, Григоріе богомудре.

#### **Кондакъ 7.**

Хотящу ти спасти чадъ тобою собранныхъ, любовь, корень всѣхъ благихъ, заповѣдалъ еси имѣти имъ между собою, юже хранящимъ общалъ еси ни въ чемъ же имѣти оскудѣніе. Испроси и намъ у челоуѣколюбца Христа благодать братолюбія, да поемъ: Аллилуіа.

#### **Икосъ 7.**

Нова ты показа Господь угодника и всей Россійстѣй, паче же Вологодстѣй странѣ, обитель бо уготовавъ себе Духу Святому, обитель для спасенія иночествующихъ создалъ еси, въ нейже труды къ трудомъ прилагая, Христоподрожительный примѣръ ученикомъ твоимъ оставилъ еси. нанѣ же взирающе, тебе вѣрнаго наставника восхваляемъ: Радуйся,



благодати жилище въ себѣ уготовавый; радуйся, доме Духа Святаго, домъ для приметающихся къ дому Божію устроивый. Радуйся, пустынолюбный орле, для птенцевъ твоихъ пустыню мира избравый; радуйся, наставниче безмолвствующихъ. Радуйся на водѣ покойнѣ слезъ и умиленія воспитаваыйся; радуйся, тоюжде пищею поста и воздержанія и послѣдователей твоихъ питаваый. Радуйся, силу Христову въ немощи явивый, и тоюже силою благодушно немощи немощныхъ носивый; радуйся, молитвенниче, молитвы твоя о врученныхъ тебѣ прилѣжно возносивый. Радуйся, тѣми же молитвами стадо твое утверждаваый; радуйся, угодниче Христовъ, Григоріе благомудре.

#### Кондакъ 8.

Странно и пришельчески жительствовати на земли Христа ради изволивый, странное для сущихъ отъ міра житіе положилъ еси: долу бо горняя мысля, и на земли небесная дѣя, и въ мірѣ сый, не былъ еси отъ міра. Тѣмже мы ублажая небесное на земли жительство твое, глаголемъ Богу: Аллилуіа.

#### Икосъ 9.

Всѣмъ сердцемъ преданъ былъ еси Христу Богу въ животъ твоемъ, Богоносе, емуже и работалъ еси въ преподобіи и правдѣ: сего ради и Господь видя труды твоя, бдѣніе же и пощеніе, еще въ жизни прослави тя подвигами святости, яже воспѣвающе, тебѣ глаголемъ: Радуйся, таинъ Божіихъ вѣрный строителю; радуйся, вѣрный священнодѣйствователю служенія Господня. Радуйся, свѣтильниче на свѣщ-



ницѣ благодатиѣмъ поставленный; радуйся, бодренный дѣлатель вертограда Христова. Радуйся, мудрствовавый яже во Христѣ Іисусѣ; радуйся, яко дѣя училь еси презирати плоть, прилѣжати же о души, вещи безсмертнѣй. Радуйся, плоть уму и умъ духу покоривый: радуйся, духомъ ходивый, и похоти плотскія отгнавый. Радуйся, различными страстьми боримымъ помощниче; радуйся, угодниче Христовъ, Григоріе богомудре.

### Кондакъ 9.

Всякое тщаніе прилагалъ еси, богоблаженне, еже вознагражденную отъ тебе обитель содѣлати вертоградомъ благоплоднымъ, да дѣлатели его, наслаждаясь во время свое плодамъ трудовъ твоихъ, воспѣвають согласно Богу въ день вѣчнаго веселія: Аллилуіа.

### Икосъ 9.

Вѣтія многовѣщанная суть дѣявія житія твоего, имиже, яко благоглаголивими устами научаши насъ возвѣщати хвалу Господню, и глаголати къ тебѣ: Радуйся, богомудрая доброто; радуйся, небесный человѣче и земный ангеле. Радуйся, смиренномудрія рачителю; радуйся, свѣтильниче, въ нощи міра сего озаряющій. Радуйся, заповѣдей Владычнихъ бодрственный бдѣстителю; радуйся, шествующихъ путемъ Христовымъ спутниче и водителю. Радуйся, колеблющихся въ вѣрѣ утверждение: радуйся, ослабѣвающихъ въ подвигахъ укрѣпленіе. Радуйся, свѣтоводителю блуждающихъ въ стезяхъ стропотныхъ; радуйся, угодниче Христовъ, Григоріе богомудре.



**Кондакъ 10.**

Снасти хоть во обитель твою притекшихъ, егда позналъ еси отшествіе твое отъ міра къ премірной жизни и отъ трудовъ къ покою, призвалъ еси братію твою, юже, яко добрый пастырь, наставивъ работати въ мирѣ Господу, вручилъ еси ихъ нову игумену, душу же твою Богу предаль еси, воспѣвая: Аллилуіа.

**Икосъ 90**

Стѣну крѣпку въ немощахъ и забрало неоторимо отъ всякихъ навѣтовъ вражїихъ показати Вседѣтель чудодѣйствіемъ во святомъ преставленіи твоємъ: начавшу бо совершатися обычному надгробному о тебѣ пѣнію и цѣлованію послѣдному, бѣснѣйшій исцѣлѣ, и одержимый болѣзнію очесъ инокъ тогда же исповѣда предъ всеми внезапное свое исцѣленіе; обрадованная же братія и ученицы, видѣвши таковое прославленіе свыше своего пастыря, воспѣша едиными усты: Радуйся, авво всеблаженне, бодрственнѣе совершивый добрый подвигъ; радуйся, къ премірному возшедый пребыванію. Радуйся, класы присноживотія пожавый; радуйся, благодать чудесъ отъ Бога пріемый. Радуйся, бѣсовскія полки побѣдивый; радуйся, вся стрѣлы лукаваго разжженныя угасивый. Радуйся, море житейское благодѣшно преплывый; радуйся, къ нестарѣющей жизни прешедый. Радуйся, небесный покой онаго вѣка улучивый; радуйся, угодниче Христовъ, Григоріе богомудре.

**Кондакъ 11.**

Пѣніе благодарственное въ сердцѣ выну прино-



ся Христу, преведшему ты непреткновенна посредѣ сѣтей многихъ: обаче отъ многого смиренномудрія во очищеніе души и тѣла твоего, дивная предъ отшествіемъ твоимъ завѣщаль еси, да тѣло твое, на немже носилъ еси язвы Христовы, егда скончаеши-ся, влекше ввергнуть въ блато; благоговѣщающая же къ отцу чада, по преставленіи твоемъ, честнѣ предаша земли тѣло твое, провождая духъ на небеса свѣтлою пѣснію Богу: Аллилуіа.

### Икосъ 11.

Свѣтозарную лучу духа явѣ показать еси и въ богосномъ тѣлѣ твоемъ, егда въ преставленіи благоуханіе разліяся отъ мощей твоихъ и цѣлбоносная сила истекла, яко отъ источника, послѣдиже и мощи твоя нетлѣнны явишася. И нынѣ въ невечернемъ свѣтѣ съ преподобными ликовствуя, по достоинству слышиши отъ насъ: Радуйся, рабе и друже Божій; радуйся, за вѣрность твою вшедый въ радость Господа твоего. Радуйся, извѣстивый званіе дѣлы; радуйся, преподобнымъ житіемъ твоимъ собравый ликъ шествующихъ по тебѣ къ Господу. Радуйся свѣтильниче, свѣтѣй и горяй о насъ предъ Богомъ; радуйся, вознося къ Богу молитвы наши, яко кадило. Радуйся, путевождю къ царству славы; радуйся денница, являющая зрящимъ горѣ солнце правды. Радуйся, пристанище взыскающимъ благодатиіа небеснаго: радуйся, угодниче Христовъ, Григоріе богомудре.

### Кондакъ 12.

Благодать Господа Иисуса исполни сердце твое



дарами Духа Святаго въ житіи твоємъ, а по смерти осія ты славою безсмертія. Мы же отъ раки мощей твоихъ воспріемля токи благодати, напоющія души наши во спасеніе, всеконечнѣ вопіемъ о тебѣ Богу: Аллилуіа.

### Икосъ 12.

Поюще твое досточудное житіе, богоблаженне, восхвалити тебе недоумѣваемъ по достоянію; обаче горя любовію къ присноживотнѣй памяти твоей, не умолчимъ вопити тебѣ: Радуйся, теченіе постническое добрѣ скончавый; радуйся, путемъ правымъ непреткновенно шествовавый. Радуйся, яко сѣявый слезами, нынѣ плоды спасенія въ радости пожинаеши; радуйся, земными подвигами небесная дарованія стяжавый. Радуйся, яко въ мирѣ жизнь скончавый, въ земли кроткихъ достойно водворяеши; радуйся, яко священникъ во священникѣхъ и пустынножитель въ пустынножителѣхъ жребій твой воспріалъ еси. Радуйся, зрѣніемъ лица Божія веселящійся; радуйся, во славѣ небесной престолу Пресвятыя Троицы предстоящій. Радуйся, о обители и стадѣ твоємъ, егоже трудолюбно собралъ еси, молящійся; радуйся, яко о всей православной церкви и благочестивомъ царствѣ россійстѣмъ выпну предстательствующій. Радуйся, угодниче Христовъ, Григоріе богомудре.

### Кондакъ 13.

О священная главо, преподобне отче Григоріе! моли непрестанно Христа Господа, да не оскудѣетъ въ насъ вѣра и святые подвиги твои, да будетъ



миръ въ братіи твоей и обиліе во оградѣ обители твоея и во всемъ мірѣ Господнемъ: тогда исполнятся радости сердца наша, и языкъ нашъ веселія, и вси воспоемъ едиными устами Владыкѣ Богу: Аллилуіа. *Трижды.*

*Сей Кондакъ глаголемъ трижды. Паки читается первый Икосъ, и паки читается первый Кондакъ.*

## МОЛИТВА

**преподобному Отцу нашему Григорію,**

*иже на Пельшмѣ рѣцѣ, Вологодскому Чудотворцу.*

О священная главо, преподобне Отче, преблаженне Авво Григоріе! не забуди чадъ твоихъ, ихже породилъ еси богоугодными трудами и молитвенными подвигами; поминай во святыхъ твоихъ благопріятныхъ молитвахъ и назидай предстательствомъ твоимъ стадо твое, еже самъ паслъ еси; моли за ны, Отче священный, дѣти твоя духовныя, яко имѣя дерзновеніе къ небесному Царю; не премолчи за ны ко Христу, и не презри насъ върою и любовію чтущихъ тя. Поминай недостойныхъ насъ предъ престоломъ Вседержителя, тебѣ бо дана благодать молиться за ны. Аще бо тѣломъ преставился еси отъ насъ, но и по смерти живъ во Христѣ пребываеши. Не отступи отъ насъ духомъ, сохраняя насъ отъ стрѣлъ вражїихъ, отъ прелести бѣсовскія и козней діавольскихъ, пастырю нашъ добрый. Се бо



ракою мощей твоихъ пребывая съ нами, святою твоею душею съ небесными силами у престола Вседержителя предстоя, достойно славиши Господа. Тѣмже, припадая со умиленіемъ, молимся тебѣ о спасеніи душъ нашихъ, испроси намъ время на покаяніе и невозбранно перейти отъ земли на небо чрезъ мытарства горькихъ бѣсовъ: да твоимъ предстательствомъ вѣчныя муки избавышеся, небесное царствіе наслѣдовати сподобимся, со всеми праведными отъ вѣка угодившими Христу Господу нашему, емуже подобаетъ всякая слава, честь и поклоненіе, нынѣ и въ безконечныя вѣки вѣковъ. Аминь.

## Молитва 2.

О добрый нашъ пастырю и богомудрый наставниче, преподобне Отче Григоріе! Услыши насъ молящихся тебѣ и призывающихъ въ помощь скорое предстательство твое. Виждь насъ грѣшныхъ въ толицѣхъ обстояніихъ сущихъ, виждь насъ немощныхъ, отсюду уловляемыхъ и всякаго блага лишенныхъ, и уможь отъ малодушія помраченныхъ. Потщися, угодните Божій, не оставити насъ въ грѣховномъ плѣну быти, да не будемъ въ радость врагомъ нашимъ и не умремъ въ лукавыхъ дѣяніихъ нашихъ. Моли о насъ недостойныхъ Спаса Господа, емуже ты со безплотными лики предстоиши. Милостива къ намъ сотвори Содѣтеля нашего въ нынѣшнемъ вѣцѣ и въ будущемъ, да не воздастъ намъ по дѣломъ нашимъ и по нечистотѣ сердець нашихъ, но по своей благодати да воздастъ намъ. На твое бо ходатайство уповая, твоимъ предстательствомъ хвалимся, твое заступленіе на помощь



призываемъ и къ цѣльбоносному гробу твоему при-  
падая недостойніи, исцѣленія просимъ. Избави насъ,  
угодниче Христовъ отъ злыхъ находящихъ на ны,  
и укроти волны страстей и бѣдъ востающихъ на  
насъ, да ради святыхъ твоихъ молитвъ не обьиметъ  
насъ напасть, и не погряземъ въ пучинѣ грѣхов-  
нѣй и въ тинѣ страстей нашихъ. Моли, преподобне  
Отче нашъ Григоріе, Христа Бога нашего, да по-  
дастъ намъ мирное жительство, оставленіе грѣховъ  
и душамъ нашимъ спасеніе и велию милость, нынѣ  
и во вѣки вѣковъ. Аминь.